



kat.komp.

15968

I

Mag. St. Dr.

P

iac?

Fredr H

Rationes contra telonii marini exacti-
onem noviter appetitam a. 1637.

2670 Prawo.

547. 11.

R A T I O N E S
contra
Telonii Marini
exactionem
noviter affectatam.
Anno 1637.

231017A

1815M 1815A

BIBLIOTHECA
VNIV.  AGELL
CRACOVIANENSIS

15968I

Privilegium Culmense. Anni 1233. ab omni penitus telonei exactione absolvit Terram, Ordini Crucigerorum olim subjectam: cujus Privilegij usus in universâ Prussiâ communiter receptus, at per injuriam Magistrorum Ordinis in exigendâ Daciâ, *Wfundzoll* dictâ, mercibus mari vectis evectisque impositâ, iniquè turbatus, cum alijs gravaminibus, excutiendi tyrannici jugi & mutandi regiminis causam præbuit.

2. Deinde Status Prussiæ, postquam sui juris esse cœperant, voluntariâ ac spontaneâ deditione Anno 1454. D. CASIMIRO Regi subjecti, Regnoqve Poloniæ incorporati, omnia sua jura ac libertates salvas sibi fore pacti sunt: atque ut in mutatione Principum commutatam etiam & sublatam deprehenderent oppressionem, Daciâ istam, *Wfundzoll* & alia omnia telonea, in Aquis & Terrâ, in Terris Prussiæ quomodolibet constituta, expressis Privilegij verbis tolli, abrogari & deponi curârunt, nullo unquam tempore, ex quacunque causâ aut occasione, instituenda aut imponenda: salvis tantum teloneis antiquis in Regno Poloniæ, de mercibus mercatorum Prussiæ, extra Regni fines provehendis. Et de hac immunitate peculiariter quoque, juxta prædictum Privilegium Terris Prussiæ concessum, Civitati Gedanensi Anno 1457. cautum est.

3. Eadem libertas posterioribus pactis & privilegijs repetita & firmata est: nempe in Pace perpetuâ cum Magistro Ordinis Año 1466. quæ utrinque nulla telonea, locis & personis, de novo imponi permit-

tit, tam in Terris quàm in Aquis: in Privilegio Regio
Año 1476. quo Jus Culmense ad reliquas Prussiae Ter-
ras extenditur, ab omnibus oneribus ac Dacijs incon-
suetis exemptas: & rursus in Pace perpetuâ Anno 1525.
cum Duce Prussiae initâ, quæ telonea in Terris Prussiae,
contra antiquam consuetudinem & privilegia, ab utraq;
parte institui prohibet.

4. Transactio D. Regis STEPHANI, pro Se & Suc-
cessoribus suis Regibus Poloniae coronatis, cum Civitate
Gedanensi inita, de auctione Portorij, ibidem antiquitus
usitati, Pfalgeldt dicti, quâ coeptum à D. SIGISMUNDO
AUGUSTO, & per multos annos tractatum negotium, cer-
tis conditionibus ad finem perduxit, in publico Regni
Conventu Año 1585. approbata, & in confessu Comitiali
Internuncijs Gedanensibus solennissimè sub sigillo Ma-
jestatis edita, manifestè disponit: quòd isthæ auctio, mu-
tuo consensu introducta, privilegijs & libertatibus anti-
quis nil derogare vel præjudicare, portorium id more in-
stitutoq; pristino exigi, æstimatio mercium penes Sena-
tum Civitatis permanere, supra eandem auctionem por-
torium, vel ex Regiâ vel ex Civitatis parte, nullâ ratione
amplius augeri, in loco consveto intra Civitatem & non
alibi conjunctim percipi, & generaliter omnis percipi-
endi portorij ratio nunquam in posterum mutari vel in-
novari debeat. Quam quidem Transactionem à D. SI-
GISMUNDO III. Anno 1588. peculiari Diplomate reno-
vatam, S. R. M.^{tas} Dominus noster clementissimus, Año
1633. solenniter confirmare dignata, & sub juramento
suo Regio, in felici coronatione corporaliter præstito,
conservare sanctè pollicita est,

5. Pactis Induciarum publicis Anno 1635. statutum est, ut vectigalia in eum reducantur statum, & in illud jus, in quo erant ante hoc bellum; (artic. 5.) commerciaq; pristina inter utrumq; Regnum restituantur, & in veteri exercitio conserventur, redeantq; omnia in eum statum, in quo ante hoc bellum fuerunt, ab omnibus novitatibus vindicata; (art. 14.) tùm ut pro majori securitate, & ne quicquam hisce pactis contrarium à quopiam committatur, Ordines Regni & Magni Ducatus Lithvaniae de impediendâ ac præveniendâ quacunq; hostilitate fide jubeant; (art. 20.) deniq; ut Dux in Prussia, Dux Curlandiae & ex Statibus Prussiae Regalis Civitates Majores caveant, se non permissuros hostile quicquam ex Portub^o suis Regine Regnoq; Sueciae, subjectisq; ditionibus ac Provinciis illatum iri, directè vel indirectè. (art. 21.) Quod speciali cautionis Instrumento, urgentibus Illustrissimis Dominis Commissariis utriusq; Partis, juxta exhibitam formulam, Civitas Gedanensis præstitit, & nihil contra tenorem pactorum se facturam promisit. Unde contraventione aliquâ admisâ, & in speciem hostilitatis acceptâ, ex novo teloneo novæ molestiae, nova pericula, quietem & tranquillitatem publicam turbare possent: possessione verò & administratione consuetâ Portus Gedanensis Civitati ademta vel impeditâ, & classe navali vectigalis causâ, contra morem in legitimis vectigalibus usitatum, ad portum collocatâ, cautionis injunctâ & præstitâ effectus inanis planè & nullus foret.

6. Ab alijs Regibus & Rebus publicis finitimis ac transmarinis gravissima odia, similitates & damna exinde proventura esse apparet: quibus condiciones compo-
siti belli Prutenici in suo robore conservandi, & commu-

nem commerciorum libertatem, longevâ consuetudine
quæsitam, & post bellicas exactiones hisce in locis vix re-
cuperatam, constanter asserendi, proprioq; commodò
invigilandi, & subditorum indemnitati maturè consu-
lendi studium non defuturum est: accedentibus fortè su-
spicionibus, quæ iisdem ad Rationem Status attentis, ac
motibus moribusq; sæculi hujus diffidentibus, facile oc-
currere possunt. Quantum hinc difficultatis & incom-
modi in Terras Prusiæ, ac consequenter Rempublicam
universam, sublato Pacis ac induciarum fructu, redun-
dare queat, præteritarum calamitatum recordatio, & bel-
lorum in viciniâ adhuc durantium miseria satis superq;
monet.

7. Cum nulli vel Provinciæ vel Palatinatui vel Ter-
ritorio, invitis ejus incolis, onus aliquod imponi possit:
ideò summam & caput quodammodò libertatis commu-
nis attingere, & contra omnes juris rationes fieri videtur
(uti quondam D. SIGISMUNDUS III. gloriosissimæ memo-
riæ rescripsit) si Status & Ordines Terrarum Prusiæ novi
vestigalis exactione graventur, in quod nunquam con-
senserunt; de quo in Conventu antecomitali delibera-
tio nulla præcessit; cui DD. Nuncij Palatinatum Prus-
iæ in ipsis Comitij contradixerunt, & tandem plurium
dissensu interveniente rem integram ad Suos retulerunt;
quod per Jura Terrarum Prusiæ admitti non posse, Sta-
tus & Ordines ex Conventu postcomitali unanimiter
declarârunt: in quorum præjudicium, cum propriæ sa-
lutis jacturâ, Civitas Gedanensis festinatæ executioni se
submittere non potuit; sed humilimis Supplicationis
sue literis clementiam S. Reg. M.^{ti}s subjectissimè im-
ploravit,

8. Sine

8. Sine consensu Serenissimi Electoris, in Prussia Ducis, juxta pacta feudalia & receptam in Portibus Prussiae æqualitatis consuetudinem, in communi hac causâ nihil statui; neq; is citra omnium Ordinum Provinciarum Ducalis Prussiae liberam voluntatem ex Legum præscripto impetrari; vel ob novissime cautionis fidem, Regno Sveciæ datâ, Induciarum tempore ad novi juris constitutionem sperari potest. Quare D. SIGISMUNDUS III. cum de autione Portorum consultationes suscipiendas aliquando putaret, & sine consensu eorum omnium, qui Portus aliquos habent, nihil certi determinari posse agnosceret, ad eam rem ritè perficiendam, post coeprum cum Serenissimo Electore & Illustrissimis Curlandiæ Ducibus tractatum, Civitatis Gedanensis assensum & sententiam solenni Legatione benignè requisivit: quâ cognitâ, & dissensus rationib⁹ clementissimè attentis, nequicquâ innovandum censuit.

9. Magnum Reipublicæ detrimentum, magnum privatarum facultatum dispendium in novo vectigali constitutendo vertitur: quod nuperi belli exactio Spiringiana satis comprobavit. Turbatis enim & depravatis rei mercatoriae rationibus, commerciorum frequentia, quæ incrementum affert Regnis & vires auget, paulatim deficiet, & mercatores exteri, libertates suas sectari & nova onera defugere consueti, portus Prussiae non minus sponte suâ averfabuntur, quàm authoritate Superiorum adacti necessario declinabunt; Gedanenses verò alijq; Pruteni, ob novitatem rei inopinatæ & noxiæ, in peregrinis regionibus citra culpam suam exosi, commercia solita apud externos deferere cogentur: adeoq; cessante negotiationis mutuae commodo, ac in alias Civitates maritimas spe lucri

eri majoris derivato, proventus incolarum Regni & Magni Ducatus Lithvaniae maximâ sui parte minuentur, & serâ poenitentia ductis damni remedium sine notâ aliquâ vix suppetet. Quod eò magis verendum, quòd acerbius famosissimi Publicani ex questu publico largum quæstum facere satagent: quos eodem planè modo nunc, uti in Praefecturâ telonei Suecici, licentiam immodicam sibi sumere, & duplo triplovè gravius vectigal exigere conatos esse, cujus solutio quinquies aut sexies iterata summam mercium nonnullarum capitalem æquare & consumere queat, nautarum & mercatorum indicia arguunt.

10. Denique, ut plures rationes consultò omittantur, postquam Año proximè elapso 1636. S. R. M.^{tas} Dominus noster clementissimus vectigal aliquod maritimum ad biennium saltem exigendum destinasset; neq; tamen temporaneæ exactionis præjudicium inter belli reliquias juris indubitati & Boni publici observantia tolerare posset: supradictis rationibus à Civitate Gedanensi allegatis benignissimè acquievit, ejusq; desiderijs voluntatem suam accommodando, tantâ pecuniæ summâ gratitudinis loco acceptâ, quantam in terris Prussiae nunquam unâ vice erogatam esse constat, exactione novâ supersedendum, & Reverсалibus literis jura & privilegia, libertatesq; & pacta portorij deinceps etiam conservanda & confirmanda duxit.

Responsio

Responsio
ad rationes
adversarias.

Qui ex adverso Constitutionem Regni opponunt, novissimè latam, de rationibus ineundis, ad comparandos redditus maritimos; in eà consensum unanimem desiderari, adeoq; animam legis deficere frustrà dissimulant: quod ipsa Constitutionis verba palàm præ se ferunt, & expressam conditionem continent, ne privilegij & libertatibus, tam Equestri Ordinis quàm Civitatum, derogatum censeatur. Tùm quoq; contra priorem Constitutionem Anni 1633. quæ in Conclusionem Comitiorum proponi vetat, quicquid antea à Nuncijs Terrarum communiter receptum non sit; non modò nullo consensu, sed & frequenti contradictione præviâ, quæstionem istam prolixis aliquot horarum disputationibus in fine Conventus Regni agitatam; & contra privilegij Prutenici dispositionem, quod omnes causas notabiles, Terras Prussiæ concernentes, cum communi Consiliariorum, Spiritualium & Sæcularium, Nobilium & Civitatum Majorum consilio terminari, tractari & diffiniri jubet; nec non contra Pacta portorij, quæ in maritimâ expeditione Civitatis Gedanensis, quia præ cæteris illâ afficitur, æquam rationem haberi volunt; manifesto Terrarum Prussiæ dissensu non attento, novitatem facti inopinatò subsecutam esse, omnibus constat.

2. **Supremum maris dominium**, quod exemplo aliorum Principum proventus vectigalium conjunctos habere dicitur, indubiam & tot sæculorum usu firmatam immunitatem tollere, & jus legitimè quæsitum in vitis possessoribus auferre non potest: nec summæ potestatis sublimitas obstat, quò minus pacta conventa & consuetus privilegiorum usus in vigore maneat: verum uti imperium in Terras & Civitates quaslibet certas libertatum prærogativas non excludit; ita salvo Superioritatis respectu, administrationem Portuum & juris maritimi exercitium, secundum privilegij tenorem, in plenâ ac pacificâ possessione & usu, uti hætenus fuit, deinceps etiam absque aliquo præjudicio vel impedimento relinqui & conservari fas est.

3. Si quis ab eo tempore, quo Sceptro Polono Prussia paruit, præter antiquum portorium, marini telonei exactionem unquam in usu fuisse, aut D. SIGISMUNDUM AUGUSTUM possessionem vectigalis nautici sibi vendicasse existimet, multum sanè fallitur. Nam laudatissimi istius Regis ætate extra Prusiam quidem Civibus Gedanensibus, in Regno Polonia mercaturam exercentibus, contra morem veterem & privilegiorum præscriptum, nova telonea privato ausu primò imposita fuere; de quibus sæpius conquesti, & Responsis, Mandatis, Decreto atque Edictis Universalibus Regium patrocinium experti sunt: naves etiam speculatoriæ ad prohibendam Narvicam navigationem, ne Mosco hosti vires adderentur, Anno 1566. mari immissæ, amicis pariter ac inimicis infestæ, & damna ingentia Civitati Gedanensi in Regno Dania causatæ, novarum turbarum occasiones præbuere: [quale prædonum & speculatorum genus D. Rex

STE-

STEPHANUS in Privilegio suo planè abominatus est, fu-
oq; & successorum nomine sustulit:] at de Vectigalibus
novis intra Prussiam nihil auctoritate Regia statutum est.
Quin imò cum per Commissarios, instinctu adversario-
rum in Civitates Prussiæ destinatos, status earundem o-
diis malevolorum & arbitrariâ privilegiorum interpre-
tatione admodum turbatus esset; etsi de portorij soliti
auctione, in usus Regios certis conditionibus conceden-
dâ, per plures annos cum Ordinibus Civitatis Gedanensis
tractatio intercessisset, ea ramen usque ad D. STEPHANI
tempora nondum definita, nedum exactio portionis Re-
giæ ad effectum deducta est: quod ipsa portorij Pacta lu-
culenter testantur. Quæ autem aliàs vel in præjudicium
usitati juris, contradicentibus & protestantibus Ordini-
bus universis, in præfatâ Civitate attentata & constituta;
vel in Comitij Regni Anno 1570. Delatorum importu-
nitate facta, inq; Civitatis contumeliam & damnum ab
Internuncijs ejusdem, (ex quorum numero primus, di-
gnitatis & existimationis jacturam passus, probrosam ju-
sto mœrore vitam clausit) sive vanâ spe seductis, sive me-
tu adactis & privati periculi minis territis, gesta dictaq; &
extra Instructionis metas acta sunt; (quæ cum teloneo ni-
hil commune habent, sed delectationis ergò ad concili-
andam invidiam nuncpasim circumferuntur) ob defe-
ctum mandati nunquam eo loco habita vel eum effectû
fortita fuerunt, acsi publico nomine culpam aliquam re-
atus agnosci vel poenas meritò sustineri oportuisset: nec
vi istarum actionum & Constitutionum Commissoria-
lium quicquam de statu Civitatis immutatum est; sed o-
mnes ejus Ordines ac Cives realiter & effectualiter ab ist-
hac tota Commissione, & omnib⁹ ejus attinentijs & gra-

vaminibus, per pacta portorij relevati & liberati, post satisfactionem obtentam, jure, honore ac fide integra gaudent: detentos quoque Preconsules, absolutorio Decreto dimissos, publicæ salutis curam privatis damnis ac periculis, in se conjectis, potiore habuisse, & superatis adverificationibus innocentia suæ fructum, cum perpetua defensionis libertatis laude, sine ulla famæ maculâ reportasse publicè innotuit. Quam totius fabulæ Catastrophen, nec callidè reticere, nec libenter ignorare debent, qui controversias dudum abolitas ex obsoletis chartis in Theatrum producere gestiunt.

4. Necesitatis assertæ vel speratæ utilitatis prætextum facile vincet damnorum & discriminum comparatio, quæ novis necessitatibus Reipubl. implicare & novi consilij emolumentum evertere possent. Neque enim diffiteri licet, superioribus annis & sæculis, haud minore Majorum prudentia Reipubl. prospectum, & sine cujusquam injuria legitimis ac salutaribus medijs necessariæ defensionis curam, tot tantisque bellis gloriosè gestis, susceptam esse. Itaque ne novum securitatis præsidium in triste contentionis & infortunii receptaculum degeneret, ejusque negotij successus intolerabilior quam feliciorevadat, summe perè cavendum est. Quod si maximè locupletandi ætarii spes subsit, non tamen protinus Prusсияjuribus suis exuenda erit; aut eadem ratione proventus Ecclesiastici & Capitaneatus seu Præfecturæ bonorum Regalium Thesauro Reipubl. addicendi venient: cum nihil possit esse utile, quod non simul sit honestum & justum; neque adeo contributionum onera solita, in fraudem aliorum, insolitis & illicitis gravaminibus permu-
tari æquitas syadeat.

5. Atqui in se ipsos onus omne redundare, & pretio venditionis mercium Polonicarum tantundem deeedere, vel emtionis rerum exoticarum accedere ajunt, quantum vectigalis nomine penditur; nec mercatores sive Prutenos sive externos id afficere: quos impensarum quarumvis calculo subducto indemnitati suę probè consulere opinantur. Hæc si tam vera quàm speciosa essent, & ab intentione affirmacium non aliena, rectius utique & convenientius, illæsis Prussiæ juribus, in ipsa Polonia tributo isto merces venditas emtasq; decimari sinerent, qui immunitatem teloneorum, Equestri ordini competentem, inter præcipua libertatis pignora hætenus tuendam duxerunt. Quoniam verò de peregrinis idem dici potest, quod nempè vilius merces suas venditari, carius nostras domesticas emturi sint: utroq; modo ostenditur, difficillimam commerciorum rationem fore, & mercatoribus Prussiæ, præcisus victus quærendi medijs, ex nova rerum perplexitate extremam perniciem & fortunarum exitium imminere; quæ inseparabili nexu Regnicolarum commodis ac incommodis coherent.

6. Moderatius sentiunt, qui Privilegia Prussiæ non localia, sed personalia esse putant: errore tamen aperto ducuntur, non modò disertis Privilegiorum verbis, sed & continuâ consuetudine, quæ optima legum interpret est, vehementer repugnantibus, & universè omnem intra Prussiæ terminos telonij institutionem, in Poloniâ omnem novam in Prutenos impositionem, distinctim amoventibus: quorum respectu Exactio, quondam ad album montem Vistulæ contiguum cœpta, subsistere non potuit, sed ad Fordanum translata incolis Prussiæ minùs molesta visa est.

7. Cautionem insuper adhibendam svadent; ne voluntariâ submissione juribus antiquis præjudicium creetur. Ast quia protestatio facta contraria parum prodest, & in portorij pactis cautionis hujus vinculum extat: non licet amplius privilegiorum effectum inani cautione frustrari: ne idem eveniat, quod neglecto Indigenatus jure, pluribus cautionibus suffulto, nimis grave Prutenis accidit; postquam abusus nimias vires sumsit, & postpositis veris indigenis, dignitates & officia, Castra & Tenuæ frequentius extraneis conferuntur.

8. Mirum alijs videtur, cum hostiles Svecorum exactiones toleratæ sint, eas S. Reg. Majestati & Reip. denegari. Mirari tamen desinent, cum hostem ad tuenda jura & privilegia non teneri meminerint, quia hostis est: Regem verò clementissimum & Patrem Patriæ juribus, juramento suo & subditorum suorum firmitatis, inviolabiliter conservandis obligatum esse, quia Rex & Pater est: quem hosti æquiparare velle, & dictum nefandum, & cogitatu absonum videtur: qui ideo pacem restituit, ut hostilia facta cessarent, nullatenus ad imitationem trahenda.

9. Ne scrupulum moveat, quòd in Civitate Gedanensi contributiones aliquæ, *Bulage* vocatæ, exiguntur; sciendum est, plenam Regiam potestatem Ordinibus Civitatis ex Privilegio Casimiriano Anni 1455. competere, Contributiones sive pecunias subsidiarias de omnibus bonis & mercibus, pro temporum ratione ipsiusque Civitatis commodo, indicendi ac vicissim remittendi, prout ipsis melius & utilius videtur, sine ullius

ullius interpellatione vel contradictione: eoqve jure suo antiquitus usque ad hæc tempora ita eos uti, ut collectas quasdam modicas & tolerabiles, ceu usus postular, sibimetipsis suisqve bonis, & mercibus in dominio suo constitutis ultrò imponant, easqve subinde ex naturalis rationis dictamine minuant, (veluti jam post pactas inducias factum) ne in propria peccent commodâ; & qvoniâ redditus opinione tenuiores inde comparantur, aris alieni adminiculo sumtus publicos sustentent: qvo ipso nemini nocent, sed propriarum facultatum profusione communem utilitatem securitatemq; pro salute Reip. promovent, quam nuperi belli Prutenici testimonio, fideliter ac constanter ope opibusqve tutati sunt. Itaque in Privilegio Anni 1457. qvo telonea maritima prohibentur, antèrius illud nominatim excipitur, neqve ei qvovis modo derogari conceditur. Istæ autem Contributiones civicæ, qvia lucro Civium decedunt, & inter expensas domesticas computantur, non magis ad alios pertinent, qvàm capitationis & centesimi nummi census, vel reliquorum sumtuum privatorum erogatio: qvos vel industriâ, vel parsimonia resarcire boni patresfamilias conantur, nec tamen semper intentionis suæ scopum assequuntur, lucri damnivæ qvantitate, pro vicissitudine ac varietate circumstantiarum, varias vices mutante.

10. Tandem omittendum non est, qvòd ex bienij mentione, in Rescripto S. Reg. Majestatis novissimo factâ, transactionem eam tempore finiri, vel promissione istâ S. Reg. Majestatis Rempub. non teneri
absur-

absurdè quidam existimant: siquidem multò minus
perpetua immunitatis convulsio, quàm temporaria
suspensio ferri potest; & nemo tam rationis expers
videri debet, qui grandem pecuniæ summam expen-
dere velit, ut jus certum & immutabile, cujus usum
perpetuum interrumpi non patitur, brevi temporis
exitu terminetur: neque porro passionum veterum
fides, præsertim eo tempore primitus data, quo Re-
ges ex sententia Senatus Imperio functi separatas à Re-
pub. rationes non habuerunt, Regia autoritate huc-
usque conservata, in dubium vocanda est, nisi uni-
versa simul jura antiqua, ipsamque Terrarum Prussiæ
incorporationem, novandarum rerum studio antiqua-
re libeat.

*Hiscæ ad Justitiæ bilancem æquo judicio examina-
tis, quid de toto negotio statuendum sit, Patria, Pa-
cis & Libertatis amantes rectius
estimabunt.*

Biblioteka Jagiellońska



stdr0006941

